



L'equipa activa da Rueun quest onn: Davos da seniester Martin Schär, Luca Montalta, Tizian Schär, Giovanni Damiano, Jan Tomaschett, Patric Cavigelli, Joel Candrian, Dominic Candinas e Tobias Schär. Davon da seniester Joris Tomaschett, Nicolas Schnoz, Elia Arpagaus, Christian Caduff, Adam Derungs, Mirco Dermond, Curdin Petschen, Americo Soares, Jonathan Flütsch e Marc Mirer. Silla foto mauncan Ian Spescha, Roni Caminada, Aurelio Valaulta, Mauro Arpagaus, Simon Casanova, Rodrigo Lima e Gino Arpagaus. FOTOS MAD

Pintg'uniun cun gronds success e bien avegnir

L'Uniun sportiva Rueun ha motiv da far fiasta. Sonda, ils 3 d'ost 2024 seregorda ella da sia fundaziun e surtut dil giubileum da 60 onns dapi ch'ella ei separticipada l'emprema ga al campinadi da ballapei. Ed igl avegnir para era d'esser segiraus. Cun ina squadra cun 26 giugadurs absolve l'equipa questa stagiun danovamein il campinadi dalla 5. ligia.

HANS HUONDER/FMR

Ils onns 1948 e 1964 ein bein ils decisivs ella historia dall'Uniun sportiva Rueun. Culla finamira principala da promover l'atletica leva, il sport d'unviern, il ballapei sco era la perinadad e la cumpignia denter ils commembers eis ella vegnida fundada 1948. 1964 eis ella allura separticipada l'emprema ga al campinadi da ballapei regional. Lu era la 4. ligia aunc la pli bassa ligia. Il medem onn daventa l'USR commembra dalla Federaziun da ballapei grischuna. 1966 suonda in ulteriur impurtont tierm ella historia dall'uniun: Ad Isla vegn fatg las empremas lavurs da construcziun per la piazza da ballapei.

Victoria el cup e si en 3. ligia

Gia treis onns suenter l'emprema stagiun el campinadi contonscha Rueun il final dil Cup grischun, mo spiarda quel encunter Danis/Tavanasa. Meglier eis ei igl onn 1968 cura che l'equipa victorischa el final encunter Mustér. 1977 suonda la promoziun dalla 4. ella 3. ligia. Mo gia in uonn suenter il retuorn ella 4. ligia. Da

1976 entochen 1978 gudogna l'US Rueun treis ga en seria il turnier da ballapei dalla Fabrica da ponn Trun. Quei turnier gudogna ella ina quarta ga igl onn 1991. 1982 suonda il retuorn ella 3. ligia e leu resta l'equipa duas stagiuns. Pliras ga ei Rueun la megliera equipa sursilvana dalla 4. ligia – mintgamai undrada dalla Gasetta Romontscha – e gudogna era turniers da halla a Mustér e Samedan.

Equipa reactivada

1996 ei lu in onn meins legreivel ella historia dall'uniun: Muort munconza da giugadurs sto ella reter si'equipa activa dil campinadi. Igl onn 2006 lu il retuorn el campinadi. Sin iniziativa da *Claudio Brenn*, *Rico Cadalbert* ed *Ignaz Schnoz* vegn l'equipa reactivada. Dapi lu separticipescha ella regularmein al campinadi dalla 5. ligia cun excepziun dalla stagiun 2010/11 ella 4. ligia. Engaschament endinau ha l'uniun buca mo mussau en quels onns el campinadi, mobein era enten organisar fiastas el vitg ed era el manteniment da sia piazza da ballapei ad Isla. Successivamein ei l'infrastructura da quella vegnida migliurada. Aschia cun

endrizzar ina nova illuminaziun igl onn 2022 ni quater onns avon l'installaziun d'indrezs da schuar automatics.

26 giugadurs activs

Ils davos onns han plirs clubs da ballapei en Surselva fusiunau ni han stuiu terminar lur engaschament el campinadi regional muort munconza da giugadurs. Tier l'US Rueun ei la situaziun actuala tut autra. «Per nus ei ina fusiun negin tema ed era buca ina collaboraziun cun in auter club. Il mument havein nus ina fetg bun'atmosfera ell'uniun ed ils davos onns ein ulteriurs giugadurs giuvens vegni ell'equipa», di *Joris Tomaschett* (30) che trenescha la squadra activa communalamein cun *Marc Mirer*. L'equipa dumbrava il mument 26 giugadurs: «Ils biars habiteschan cheu ni ein oriunds da Rueun, auters ein vegni tier nus sin fundament da camerats.» Che l'uniun stetti bein il mument hagi surtut in motiv, di *Joris Tomaschett*: «Tier nus ha il success buca emprema prioritad. Pli impurtont ei la cumpignia ed il spert d'equipa. Per quei motiv essan nus in'otra uniun che las autras.» Secapescha ei era el cun-

sciens dil pign diember d'affons el vitg e digl avegnir dalla squadra: «Quei ei aschia, mo nus empruein da viver nosa filosofia ed il mument dat quella tenuta raschun a nus.» Sil sector dils juniors sustegn l'USR finanzialme in las stentas dalla cuminonza da juniors dils clubs da ballapei dalla Surselva.

Engaschi davos las culissas

Decisivs per la cuntinuitad d'ina uniun ein funcziunaris era davos las culissas, en special la suprastanza. Entochen avon biebein in'jamna ei *Hubert Gross* staus president dall'US Rueun. Siat onns ha el tgamunau quella cun success avon che surdar la bitgetta a *Damian Tomaschett*. Ensem cun el sesan igl actuar *Tizian Schär*, la cassiera *Ramona Simmen*, il president dalla cumissiun da giug *Christian Caduff* ed il schef infrastruttura *Jan Tomaschett* ella suprastanza. *Claudia Tomaschett* ei responsabla per la homepage e las fotografias.

Fiasta da giubileum ad Isla

Sonda, ils 3 d'ost 2024 festivescha l'Uniun sportiva Rueun il giubileum da

60 onns dapi l'emprema stagiun el campinadi da ballapei regional. Ella fa quei naven dallas 15.00 cun giugs da ballapei cun equipas da Laax, Turgi e Rueun. En acciun vegnan giugadurs activs e da quels che han pendiu lur calzers da ballapei vid la guota gia avon entgens onns. Envidai ein denton era sponsurs ed amitgs. Sco *Joris Tomaschett* di, ein tuts anteriurs commembers dall'USR envidai alla festività che culminescha cul plaid festiv allas 20.15 ed il concert suadont dil *Don Gamboni Trio: Pascal Gamboni, Valeria Zangger e Rees Coray*. La fiasta da giubileum ha liug silla piazza da ballapei ad Isla a Rueun. Leu vegn era exponiu scartiras e fotos da temps passai dall'uniun.

La foto sill'emprema pagina muossa l'equipa activa da ballapei dall'Uniun sportiva Rueun igl onn 1968. Davos da seniester: *Ciril Dermont, Marius Cadalbert, Glieci Dermont, Rest Paul Albrecht, Pieder Tschuur, Toni Destito e Tomas Marty*. Davon da seniester *Fredi Lutz, Gion Tschuur, Juli Buholzer, Sep Tschuur, Tini Alig e Meinrad Dermont*. Silla foto maunca *Linus Dermont*.



L'equipa da Rueun igl onn 1991a Rabius. Davos da seniester Kurt Dietrich, Christian Dermont, Remo Veraguth, Serafin Spescha, Flipi Seeli e Remo Dermond. Davon da seniester Reto Dietrich, Merens Tschuur, Gocca Jan-ki, Toni Grischott, Marcus Seeli, Corsin Derungs ed Ignaz Schnoz.



Igl atun 2006 ei l'Uniun sportiva Rueun returnada cun si'equipa activa el campinadi da ballapei regional dalla 5. ligia. Davos da seniester *Claudio Brenn, Gion Caviezel, Lucas Schnoz, Robert Ene, Gian Carlo Tschuur, Faruk Pleh, Giovanni Damiano, Moreno Ivani, Ursin Candinas ed Aurelio Valaulta*. Davon da seniester *Rui Rodrigues, Rino Cavigelli, Silverio Rodrigues, Rene Carigiet, Ricardo Sobral, Flurim Bojaj e Rico Cadalbert*.